



REPUBULIKA Y'U RWANDA
MINISITERI YA SIPORO

AMABWIRIZA AGENGA AMARUSHANWA
“UMURENGE KAGAME CUP” UMWAKA WA 2025-2026”

I. INTANGIRIRO

Aya marushanwa yatangiye mu mwaka wa 2006, atangira yitwa “Amarushanwa y’Imiyoborere Myiza” agamije kwimakaza amahame y’imiyoborere myiza.

“Umurenge Kagame Cup” ni amarushanwa ahuza amakipe y’Umupira w’Amaguru (Football), Volleyball, Basketball, Imikino Ngororamubiri (Athletisme), Sitball Umukino w’amagare (Cycling) no Kubuguzza y’imirenge yose yo mu gihugu, agakorerwa muri buri karere, amakipe ya mbere agakomereza irushanwa ku ntara n’Umujyi wa Kigali, maze ayarushije ayandi muri buri mukino agahurira mu marushanwa asoza (Finals) ku rwego rw’Igihugu.

Mu mwaka wa 2010, mu nama yahuje ubuyobozi bwa MINISPORT na MINALOC, aya marushanwa yahinduye inyito yitwa “Umurenge Kagame Cup” mu rwego rwo kugaragaza no gushimira Nyakubahwa Perezida wa Repubulika y’u Rwanda, Paul KAGAME uruhare rwe rukomeye mu miyoborere myiza n’inkunga atanga mu iterambere rya Siporo mu Rwanda no mu karere igihugu cyacu gihereyemo. Muri iyi nama ni naho hafatiwe umwanzuro wo kwagura amarushanwa ku yindi mikino ntabe ay’umupira w’amaguru gusa.

Amarushanwa y’ “Umurenge Kagame Cup” yatekerejwe kandi mu rwego rwo gutanga amahirwe n’uburyo bwo guhuza abaturage mu Mirenge yabo binyujijwe muri siporo. Aya marushanwa agira uruhare mu **guteza imbere umuco wo guhiga no kurushanwa** bihereye ku rwego rw’umurenge no mu mashuri, bityo abafite impano zihariye mu mikino inyuranye bakigaragaza ndetse bakaba bafashwa kuziteza imbere.

Amarushanwa y'uyu mwaka wa 2025-2026 azatangirwamo ubutumwa buzibanda kuri ibi bikurikira;

1. Kwimakaza imiyoborere twifuza duharanira ko Umuturage aba ku Isonga
2. Ubukangurambaga mu rubyiruko bugamije kuzamura imyumvire yarwo:
 - a) *Kurwanya ibiyobyabwenge, ubunebwe, ubuzererezi, ubwamanzi n'indi mico idakwiye umunyarwanda;*
 - b) *Kurwanya ihohotera rishingiye ku gitsina dutangira amakuru ku gihe;*
 - c) *Gukumira no kurwanya gusambanya abana n'inda ziterwa abangavu;*
 - d) *Kuganira ku bubu bwo kwishora mu mibonano mpuzabitsina mu rubyiruko, n'ingaruka zirimo;*
 - e) *Gushishikariza urubyiruko guhanga umurimo, guteza imbere impano zabo no guteza imbere ibikorera mu Rwanda;*
3. Kurwanya imirire mibi n'igwingira ry'abana;
4. Gukumira no kurwanya amakimbirane mu muryango;
5. Gushishikariza abaturage kugira isuku aho ariho hose;
6. Gushishikariza abaturage gukora siporo n'akamaro kayo ku buzima;
7. Kugira umuco wo kurushanwa no guteza imbere impano zinyuranye;
8. N'ibindi...

Uyu mwaka wa 2025-2026, amarushanwa "Umurenge Kagame Cup" hazakinwa imikino ikurikira mu bagore n'abagabo:

Football, Sitball, Basketball, Volleyball, Imikino ngororamubiri (gusiganwa ku maguru no gisimbuka urukiramende), Umukino w'amagare no Kubuguza.

II. INTEGO Z'AMARUSHANWA "UMURENGE KAGAME CUP"

Intego z'amarushanwa y' Umurenge Kagame Cup ni izi zikurikira:

- Guteza imbere amahame y'imiyoborere myiza harimo gutanga serivisi nk'uwikorera;
- Gukangurira abanyarwanda kugira umuco wo kurushanwa hagamije guteza imbere impano zinyuranye;
- Gushishikariza abaturage kugira uruhare mu miyoborere myiza binyuze muri siporo;
- Gukora ubukangurambaga kuri gahunda za Leta zitandukanye binyuze mu mikino.

Icyitonderwa:

Izi ntego zigomba gusobanurirwa abakinnyi n'abaturage bitabiriye imikino.

INZEGO ZIFITE URUHARE MU GUTEGURA NO GUKURIKIRANA AMARUSHANWA UMURENGE KAGAME CUP 2025-2026

Ku rwego rw'igihugu:

Amarushanwa azakurikiranwa n'izi ntego zigize Steering Committee: Minisitiri ya Siporo (MINISPORTS), Minisitiri y'Ubutegetsi bw'Igihugu (MINALOC), Minisitiri y'Uburezi (MINEDUC), Minisitiri y'urubyiruko n'iterambere ry'ubuhanzi (MoYA), Urwego rw'Igihugu rw'Imiyoborere (RGB), Polisi y'Igihugu (RNP), Inama y'igihugu y'Abantu bafite Ubumuga (NCPD), n' amashyirahamwe y'imikino ikinwa muri aya marushanwa.

Steering committee ku rwego rw'Igihugu iyoborwa na Minisitiri wa Siporo akungirizwa na Minisitiri w'Ubutegetsi bw'Igihugu.

Ku rwego rw'Intara n'Umujyi wa Kigali

Komite itegura aya marushanwa igizwe n'aba bakurikira:

- Umunyamabanga Nshingwabikorwa w'Intara/Umuyobozi mukuru w'ibikorwa by'Umujyi wa Kigali (Umuyobozi wa Komite);
- Umuyobozi ushinze imiyoborere n'imibereho myiza mu Intara/Umuyobozi mukuru w'iterambere ry'imibereho myiza n'imiyoborere mu mujyi wa Kigali (Umwanditsi);
- Umujyanama w'Intara/Umujyi wa Kigali mu by'amategeko;
- Umuhuzabikorwa w'Inama y'Igihugu y'Abagore;
- Umuhuzabikorwa w'Inama y'Igihugu y'abantu bafite ubumuga;
- Abahagarariye inzego z'umutekano;
- Umukozi ufite siporo mu nshingano mu mujyi wa Kigali
- Undi wese Intara cyangwa Umujyi wa Kigali babona ko ari ngombwa.

Ku rwego rw'Akarere, Komite igizwe n'aba bakurikira:

- Umuyobozi w'Akarere/Umuyobozi Nshingwabikorwa w'Akarere (Umuyobozi);
- Umunyamabanga Nshingwabikorwa/Umuyobozi w'imirimo rusange (Umuyobozi wungirije)
- Umuyobozi w'ishami ry'imiyoborere myiza (umwanditsi)
- Abahagarariye inzego z'umutekano;
- Umuyobozi ushinze uburezi;
- Umuhuzabikorwa w'Inama y'Igihugu y'Urubyiruko;
- Umuhuzabikorwa w'Inama y'Igihugu y'Abagore;

A

- Umuhuzabikorwa w'Inama y'Igihugu y'Abantu bafite ubumuga;
- Umukozi ufite siporo mu nshingano ;
- Umukozi ufite mu nshingano abantu bafite ubumuga;
- Umukozi ufite mu nshingano uburinganire n'iterambere ry'umuryango;
- Undi wese Akarere kabona ko ari ngombwa.

III. AMABWIRIZA Y'IBANZE AZAFASHA IMIGENDEKERE MYIZA Y'AMARUSHANWA

1. Uyu mwaka w'imikino, abakinnyi bazandikwa hifashishijwe ikoranabuhanga ugeraho unyuze kuri iyi link (<https://kagamecup.minisports.gov.rw>).
2. Football (abagabo/abagore) izatangirira ku rwego rw'Umurenge mugihe indi mikino(abagabo/abagore) izatangirira ku rwego rw'Akarere;
3. Uwemerewe gukina aya marushanwa agomba kuba:
 - ✓ Afite indangamuntu y'u Rwanda cyangwa icyangombwa kiyisimbura;
 - ✓ Kuba agaragara ku rutonde rwatanzwe muri system yavuzwe haruguru;
 - ✓ Umunyamahanga uba mu gihugu mu buryo bwemewe n'amategeko afite icyangombwa kibigaragaza cyatanzwe n'urwego rubishinzwe;
 - ✓ Umuntu wese ufite icyangombwa cy'ubuhunzi yemerewe gukinira umurenge abarizwamo gusa mu gihe yujuje ibisabwa;
 - ✓ Atari mu bahaniwe kutubahiriza amabwiriza y'amarushanwa y'Umurenge Kagame Cup y'umwaka wa 2024-2025.
4. Nta mukinnyi wemerewe gukinira Umurenge /Akarere urenze umwe muri aya marushanwa;
5. Buri murenge n' akarere basabwe kwandika muri sisiteme abakinnyi b' imirenge n' ikipe z'akarere mbere y'itariki ntarengwa iteganywa n' amabwiriza kuko nyuma y' iyo taliki kwandika abakinnyi ntibizaba bigikunda.
6. Mu kwandika umukinnyi, huzuzwa amakuru ari kuri form ya sisiteme, umukinnyi azajya yuzuzwa inyandiko yitwa "**Player commitment Form**" igaragaza ko umukinnyi yiyemeje gukinira ikipe imwe gusa yahisemo mu irushanwa ryose. Iyi nyandiko (*consent Form*) igomba kuba ifite umukono w' umukinnyi ubwe n' uw' uhagarariye umurenge cyangwa akarere kandi igaterwaho ikashi y'urwego akiniraho.
7. Umurenge/Akarere utazandikisha abakinnyi muri sisiteme mu gihe cyagenwe, uzafatwa nk'uwikuye mu marushanwa kandi Umuyobozi w'urwo rwego asabwe ibisobanuro.

8. Amarushanwa “Umurenge Kagame Cup” akinwa n’abantu bafite imyaka 18 kuzamura mu bagabo no mu bagore, uretse mu gusiganwa ku magare hemerewe abafite guhera ku myaka 17 kugera kuri 23;
Umunyeshuri wo mu mashuri yisumbuye urengeje imyaka 21, yemerewe gukina aya marushanwa.
9. Akarere kabereyemo imikino gategura ibikenewe byose kugirango umukino ugende neza. Urugero: ibibuga, indangururamajwi, ibiranga insanganyamatsiko, Imbanguriragutabara, abatora imipira, abashinzwe umutekano n’ibindi...
10. Buri karere kazagena amatsinda hakurikijwe imirenge ikagize. Amatsinda azashyirwaho mu rwego rwo kwihutisha aya marushanwa kandi mu gihe cyagenwe;
11. Mu gihe abashinzwe umutekano n’ubutabazi badahari, umukino ntuzaba kandi mugihe Akarere kakiriye gafitemo ikipe izahanishwa guterwa mpaga.
12. Ikibuga kiri bubereho umukino kizajya kigenwa na komite ishinzwe gutegura amarushanwa kuri urwo rwego;
13. Amakipe ari bukine, agomba kugera ku kibuga isaha imwe (1) mbere y’uko umukino utangira. Ikiye izakererwa iminota cumi n’itanu (15) nyuma y’igihe umukino wagombaga gutangirira nta mpamvu igaragara yatanzwe kandi yamenyeshejwe abashinzwe gutegura amarushanwa, izajya iterwa mpaga. Abashinzwe gutegura imikino kuri buri rwego bazajya bagenzura impamvu zatanzwe zatumye ikipe itinda kuhagera mbere yo gufata icyemezo.
14. Igihe umukino wahagaze kubera impamvu zumvikana, umukino uzajya ukomeza bahereye ku munota wari ugezeho n’ibitego byatsinzwe;
15. Igihe umukino wasubitswe kubera impamvu zatangiwe ibisobanuro mu nyandiko umukino uzajya ukinwa mu gihe kitarenze iminsi itatu (3);
16. Muri iyi mikino, ku rwego rw’Akarere hazajya haba umukino umwe gusa (*aller simple/ knock out*), hakomeze ikipe yatsinze, naho imikino yo ku rwego rw’ Intara n’Umujyi wa Kigali izakinwa ku buryo bw’umukino ubanza n’uwo kwishyura (*Aller & retour*);
17. Imirenge/ikipe izagaragaraho uburiganya, gukinisha abakinnyi batujuje ibisabwa cyangwa banyuranyije n’ibikubiye muri aya mabwiriza, izahanishwa gukurwa mu marushanwa ndetse n’umuyobozi w’urwego imikino yabereyeho abihanirwe nk’amakosa y’imyitwarire mibi itabereye umuyobozi kandi umukinnyi wanyuranyije n’amabwiriza nawe ahanishwe guhezwa mu marushanwa imyaka 2;
18. Intara /Umujyi wa Kigali yatwaye igikombe cy’amarushanwa y’umwaka urangiye wa (2024/2025) izahabwa amahirwe yo guhagararirwa n’amakipe abiri ya mbere mu makipe agera ku rwego rw’Igihugu, hakabaho tombola y’uburyo azahura;

19. Abasifuzi bazifashishwa ku rwego rw'Igihugu bazajya bagenwa n'amashyirahamwe nyarwanda y'imikino (sports federations) irebwa n'amarushanwa "Umurenge Kagame Cup"

IV. AMABWIRIZA Y'INGENZI AZAGENGA UMUPIRA W'AMAGURU

1. Buri murenge usabwe kwandika muri sisiteme abakinnyi bawo mirongo itatu (30) b'abagabo na mirongo itatu (30) b'abagore bazawuhagararira mu mupira w'amaguru;
2. Umukinnyi wakinye mu cyiciro cya mbere, icya kabiri icya gatatu ndetse nabakinira juniors muri shampiyona y'u Rwanda cyangwa shampiyona yo mu kindi gihugu nyuma y'umwaka w'imikino wa 2022-2023 ntabwo yemerewe kwitabira aya amarushanwa. Kugenzura niba iyi ngingo yubahirizwa bizajya bikorwa n'ishyirahamwe ry'umupira w'amaguru mu Rwanda (FERWAFWA)
3. Umukino w'umupira w'amaguru uzajya umara igihe cy'iminota 90 (45x2) hongeweho iminota 15 y'ikiruhuko ku bagabo, naho ku bagore umukino uzajya umara iminota 60 (30x2) hongerweho iminota 15 y'ikiruhuko. Mu gihe umukino urangiye amakipe anganyije, hazajya hitabazwa za penaliti, nta minota y'inyongera izajya ishyirwaho;
4. Mu mikino y'amajonjora, umukino wabaye ugomba kuyoborwa nibura n' abasifuzi 3 kandi babihuguriwe badaturuka mu mirenge yakinye. Abo basifuzi bazajya bashakwa na komite ishinzwe aya marushanwa kuri urwo rwego.
Kuri buri mukino, hemewe gusimbura abakinnyi batarenze 7 mu kibuga kuri buri kipe.
5. Ibindi byose bitagaragara hano hazifashishwa amategeko agenga amarushanwa muri FERWAFWA:
6. Ikipe yakiriye izajya imenyeshya iyo bari buhure ibara ry'umwambaro bazakinana iminsi itatu mbere y'uko umukino uba kugira ngo amakipe atazisanga ifite imyenda isa ikipe yasuye ishake undi mwambaro utandukanije ibara n'iyakiriye.

V. AMABWIRIZA Y'INGENZI AZAGENGA IMIKINO NGORORAMUBIRI

Akarere nyuma yo gukoresha amarushanwa k'urwego rw'imirenge bazandika abakinnyi b'abagabo n'abagore bitarenze iminsi 3 y'akazi amarushanwa k'urwego rw'akarere arangiye hakurikijwe umubare uri mu mbonerahamwe iri muri aya mabwiriza. Ibyiciro by'irushanwa:

- Metero 1000 mu muhanda (Abagabo n'abagore);
- Metero 3000 mu muhanda (Abagabo n'abagore);
- Km 10 mu muhanda (abagore);
- Km 15 mu muhanda (abagabo);

- Gusimbuka urukiramende (abagore n’abagabo);

a) Ku rwego rw’Akarere

Umubare w’abazahagararira Akarere n’intera bazasiganwa bikubiye mu mbonerahamwe ikurikira:

Intera bazasiganwa	Umubare w’abagabo bazahagararira Akarere	Umubare w’abagore bazahagararira Akarere
1000m	5	5
3000m	5	5
10km	-	10
15km	10	-
Gusimbuka urukiramende	5	5

b) Ku rwego rw’Intara n’Umujyi wa Kigali

Buri ntara/ Umujyi wa Kigali bazatoranya abazaba barushije abandi, bazarushanwa ku rwego rw’Igihugu. Imibare y’abazaturuka muri buri ntara/ Umujyi wa Kigali ni iyi ikurikira:

Intera bazasiganwa	Umubare w’abagabo bazahagararira Intara/ umujyi wa Kigali	Umubare w’abagore bazahagararira Intara/ umujyi wa Kigali
1000m	5	5
3000m	5	5
10km	-	10
15km	10	-
Gusimbuka urukiramende	5	5

Icyitonderwa:

Nta mukinnyi wemerewe gukina mu byiciro birenze 2, kandi usanzwe abarizwa mu ikipe igize ishyirahamwe ry’imikino ngororamubiri mu Rwanda (RAF) nyuma y’umwaka w’imikino wa 2022-2023 wemerewe kwitabira aya marushanwa. Ibindi byose bitagaragara hano hazifashishwa amategeko agenga amarushanwa muri RAF.

Gusimbuka urukiramende:

- Gusimbuka urukiramende, abakina bahera ku burebure bwo hasi bakagenda bazamura kugeza habonetse abarusha abandi
- Umuntu yemerewe kugerageza inshuro (gusimbuka) zitarenze eshatu ku burebure bumwe;
- Abategura amarushanwa yo gusimbuka urukiramende bagomba gushaka ahantu heza hatateza abakina impanuka;
- Uwarushije abandi ashobora gukomeza gusimbuka akageza aho ananiriwe; Ibindi byose bitagaragara hano hazifashishwa amategeko agenga amarushanwa muri RAF.

VI. AMABWIRIZA Y'INGENZI AZAGENGA UMUKINO WA SITBALL

1. Buri karere gasabwe kwandika muri sisiteme ikipe igizwe n'abakinnyi batarenze makumyabiri (20) b'abagabo n'ikipe y'abakinnyi batarenze makumyabiri (20) b'abagore bazabahagararira muri Sitball bitarenze iminsi 3 y'akazi amarushanwa k'urwego rw'akarere arangiye.
2. Nta mukinnyi wakinye muri shampiyona itegurwa n'Ishyirahamwe ry'imikino y'abafite ubumuga mu Rwanda (NPC) nyuma y'umwaka w'imikino wa 2022/2023 wemerewe kwitabira aya marushanwa. NPC Rwanda izafasha mu bugenzuzi bugamije iyubahirizwa ry'ibukubiye muri iyi ngingo;
3. Sitball izakinwa gusa n'abantu bafite ubumuga kandi bafite imyaka 18 kuzamura mu bagabo no mu bagore; umukinnyi uzitabira agomba kuba ari Umuntu ufite Ubumuga nibura bungana na **30% (disability degree)** bikemezwa na muganga ubifitiye ububasha.
4. Buri mukinnyi agomba kwerekana icyangombwa kigaragaza urwego rw'Ubumuga (ikarita itangwa na NCPD cyangwa icyemezo gitangwa na Muganga wo ku bitaro by'akarere akinira). Mugihe hagaragara ko abitabiriye bafite Ubumuga bworoshye, hakwifashishwa abaganga (Classifiers) ba NPC
5. Ibindi byose bitagaragara hano hazifashishwa amategeko agenga amarushanwa muri NPC

VII. AMABWIRIZA Y'INGENZI AZAGENGA BASKETBALL NA VOLLEYBALL

1. Amarushanwa y' amajonjora azatangirira mu turere twose tugize Igihugu uko ari 30 mu bagabo no mu bagore;
2. Buri karere kagomba kwandika abakinnyi b'ikipe y'Akarere batarenze nibura makumyabiri (20) mu bagabo na makumyabiri (20) mu bagore bitarenze iminsi 3 y'akazi amarushanwa k'urwego rw'akarere arangiye.
3. Umukinnyi wese wakinye muri shampiyona zitegurwa na FERWABA na FRVB; nyuma y'umwaka w'imikino wa 2022-2023 ntiyemerewe gukina aya marushanwa. FERWABA na FRVB zizafasha mu bugenzuzi bugamije iyubahirizwa ry'ibikubiye muri iyi ngingo;
4. Umukino wa Basketball uzajya ukinwa iminota 40 igabanyijemo uduce (*quarters*) tune tw'iminota icumi buri kamwe (10min x4), mu gihe muri Volleyball ho amakipe azajya atangurana gutsinda amaseti 3 (*best of five*);
5. Mu mikino y'amajonjora, umukino wabaye ugomba kuyoborwa n'abasifuzi bemewe na FERWABA na FRVB;
6. Ibindi byose bitagaragara hano hazifashishwa amategeko agenga amarushanwa muri FERWABA na FRVB.

VIII. AMABWIRIZA Y'INGENZI AZAGENGA UMUKINO W'AMAGARE

Kuri buri rwego isiganwa rizabera ku muhanda ufite uburebure bwa Km 25 ku bagore na Km 35 ku bagabo mu buryo bwo kuzenguruka ahantu hamwe inshuro nyinshi (circuit). Byaba byiza hakoreshejwe umuhanda w'igitaka gusa.

a) Ku rwego rw'Intara n'Umujyi wa Kigali:

1. Hazarushanwa abahagarariye Akarere, aho buri mukinnyi azasiganwa ku giti cye, hakazahembwa uwakoresheje ibihe bito. Abakinnyi icumi (10) ba mbere ku rwego rw'Akarere ni bo bazahagararira Intara /Umujyi wa Kigali ku rwego rw'Igihugu, kandi bakandikwa muri sisiteme bitarenze iminsi 3 y'akazi amarushanwa k'urwego rw'akarere arangiye. Ikipe y'Akarere izaba igizwe n'abagabo 10, n'abagore 10;
2. Amarushanwa yo ku rwego rw'Intara n'Umujyi wa Kigali azayoborwa n'ubuyobozi bw'Intara bufatanije n'Isyirahamwe ry'Umukino w'amagare mu Rwanda (FERWACY) n'izindi nzego zateganijwe;

b) Ku rwego rw'igihugu

3. Kuri uru rwego isiganwa rizabera ku muhanda ufite uburebure bwa Km 25 ku bagore na Km 35 ku bagabo;
4. Irushanwa ku rwego rw'igihugu rizategurwa na MINISPORTS, MINALOC, RGB bafatanije n'Ishyirahamwe ry'umukino w'amagare mu Rwanda (FERWACY).

c) Ibirebana n'abazasiganwa

Uzemererwa kwitabira irushanwa agomba kuba yujuje ibi bikurikira:

- Kwemera gukurikiza amategeko agenga irushanwa;
 - Kuba afite hagati y'imyaka 17 na 23;
 - Gusiganwa akoresheje igare risanzwe (*single speed*) kandi rizima;
 - Kuba atarabarijwe mu ikipe (club) iri muri FERWACY y'umwaka w'imikino wa 2022-2023.
5. Usiganwa wese agomba kwambara inomero imuranga itangwa n'abateguye isiganwa, akayambara atangira kugeza arangije. Agomba kandi kuba yambaye inkweto zifunze neza n'ingofero yabugenewe (casque);
 6. Ikimenyetso gitangiza isiganwa gitangwa hamaze kugenzurwa ko ibisabwa byose ngo isiganwa ribe, niba biri mu buryo;
 7. Ibiribwa n'ibinyobwa bihabwa abakinnyi mu isiganwa bizatangwa hakurikijwe amategeko agenga amasiganwa ku magare, abakinnyi n'abatoza bakazabanza kuyamenyeshwa mbere y'uko isiganwa ritangira;
 8. Usiganwa agomba kurangiza urugendo rwateganijwe, bitaba ibyo akaba atsinzwe, agakurwa mu irushanwa;
 9. Umukinnyi wese uzitabira ayo marushanwa agomba kurangwa n'ikinyabupfura muri bagenzi be, abayobozi no mu baje kureba isiganwa.
 10. Ikipe y'Akarere igizwe n'abakinnyi 6 b'abagore na 6 b'abagabo akaba aribo bitabira amarushanwa yo ku rwego rw'Intara/Umujiyi wa Kigali;

8

11. Umukinnyi wa mbere ageze ku murongo barangirizaho, abandi bazategerezwa iminota 45.
Abazaza nyuma y'icyo gihe bazafatwa nk'abatarangije irushanwa;
12. Isiganwa ry'icyiciro cy'abagabo rizatangizwa nyuma y'iminota 20 iry'icyiciro cy'abagore ritangiye;
13. Kuri buri rwego rw'amarushanwa hazateganywa abagenzuzi bakurikira:
 - Umuyobozi w'isiganwa (Directeur de la course).
 - Abanditsi (Secretaires).
 - Aberekana inzira (Jalonneurs).
 - Abareba uko abarangije isiganwa bakurikiranye (Juges à l'arrivée)
 - Ababazi b'ibihe (Chronometreurs).
 - Abatanga ibinyobwa n'ibiribwa (Ravitailleurs);
14. Azakurwa mu irushanwa Umukinnyi uzakora amakosa akurikira:
 - Uzasunikwa n'umuntu cyangwa agakururwa n'ikinyabiziga.
 - Uzabangamira bagenzi be agamije kubagusha.
 - Uzanyura inzira y'ubusamo.
 - Uzasimburwa n'undi mukinnyi.
 - Utazarangiza urugendo ruteganijwe;
15. Umugenzuzi ubonye ikosa abimenyeshya uyoboye isiganwa (Directeur de la course).
Icyemezo cy'igihano gifatwa n'akanama nkemurampaka (Jury d'appel), bikamenyeshwa uwakoze ikosa n'uhagarariye ikipe ;
16. Akanama nkemurampaka (Jury d'appel) kagizwe n'umuyobozi w'isiganwa, uhagarariye ubuyobozi bw'aho irushanwa ryabereye n'uhagarariye FERWACY. (Igihe bari mu bayoboye isiganwa).
17. Mu gihe cy'isiganwa amategeko y'umuhanda akomeza kubahirizwa.
18. Abazagenwa na FERWACY kujya gufasha mu marushanwa yo ku rwego rw'Akarere n'urw'Igihugu bazagenerwa amafaranga y'urugendo n'ayimpamba n'inzego zihagarariye iryo rushanwa.

19. Abayobozi bo ku rwego amarushanwa yabereyeho bazajya bamenyesha abashinzwe umutekano wo mumuhanda, n'abashinzwe urwego rw'ubuvuzi amarushanwa ateganijwe; kandi bazajya baha raporo y'imigendekere y'amarushanwa urwego rw'ubuyobozi rwisumbuye.
20. Ibiateganijwe muri aya mabwiriza hazajya hifashishwa amategako agenga siporo muri rusange n'umukino w'amagare by'umwihariko.

IX. AMABWIRIZA Y'INGENZI AGENGA IKIBUGUZO

Buri karere kazandika muri Sisiteme abakinnyi 4 b'abagabo na 4 b'abagore, bitarenze iminsi 3 y'akazi amarushanwa k'urwego rw'akarere arangiye.

- Buri Murenge uzahagararirwa n'abakinnyi 8 (Abagabo 4 n'abagore 4)
- Ku rwego rw'Igihugu buri Ntara n'Umujyi wa Kigali uzahagararirwa n'abakinnyi 4 b'abagabo na 4 ba bagore bahize abandi
- Uganje undi imivuno 3 mbere y'undi aba atsinze.

X. ABAYOBOZI BATANGA UBUTUMWA BAKANATANGIZA AMARUSHANWA

Mu gihe imirenge izaba iri kurushanwa hagamijwe gushaka umurenge uzahagararira Akarere, Umunyamabanga Nshingwabikorwa w'Umurenge wakiriye amarushanwa agomba kuba ahari kandi agatanga ubutumwa bugenewe abitabiriye amarushanwa.

Mu gihe Amakipe y'imirenge ahagarariye Akarere yahuye, Umuyobozi w'Akarere wakiriye cg se undi yagena uri ku rwego rw'ubuyobozi niwe utanga ubutumwa bugenewe abitabiriye amarushanwa kandi akaba ari nawe utangiza umukino.

Ku rwego rw'Intara n'Umujyi wa Kigali, amarushanwa azajya atangizwa ku mugaragaro na Guverineri w'Intara /Umuyobozi w'Umujyi wa Kigali cyangwa n'undi yagena wamuhagararira kandi agatanga ubutumwa.

Ku rwego rw'Igihugu, umukino utangizwa n'abayobozi bakuru kandi bagatanga n'ubutumwa.

XI. AKANAMA NKEMURAMPAKA MU MARUSHANWA “UMURENGE KAGAME CUP 2025/2026”

- Ku rwego rw'Igihugu, hashyizeho akanama nkemurampaka gashinzwe kwakira, gukemura ibibazo byagaragaye mu marushanwa ahuza amakipe ahagarariye intara n'Umujyi wa Kigali, ndetse no gutanga ibihano. Komite igizwe n'abakozi baturuka mu nzego zikurikira: MINALOC (umuyobozi w'akanama), MINISPORTS, RGB (umwanditsi) n'abandi bakwiyambazwa hashingiwe ku bunararibonye mu mukino wajemo ibibazo.
- Ku rwego rw'Intara n'Umujyi wa Kigali, hashyizeho akanama nkemurampaka gashinzwe kwakira no gukemura ibibazo byagaragaye mu marushanwa ahuza amakipe ahagarariye Uturere tugize Intara n'Umujyi wa Kigali no gutanga ibihano hakurikijwe ibyo aya mabwiriza ateganya. Akanama kagizwe n'aba bakurikira: Guverineri w'Intara n'Umuyobozi w'Umujyi wa Kigali (umuyobozi w'akanama), umuyobozi w'ishami ry'imiyoborere myiza mu Ntara n'Umujyi wa Kigali (umwanditsi), inzego z'umutekano mu Ntara n'Umujyi wa Kigali n'undi wese Intara cyangwa Umujyi wa Kigali wakwifashisha mu gukemura ikibazo;
- Ku rwego rwa buri karere, hashyizeho akanama nkemurampaka gashinzwe kwakira no gukemura ibibazo byagaragaye mu marushanwa ahuza amakipe ahagarariye imirenge igize akarere no gutanga ibihano hakurikijwe ibyo aya mabwiriza ateganya. Akanama kagizwe n'aba bakurikira: Umuyobozi w'Akarere/Umuyobozi Nshingwabikorwa w'Akarere (umuyobozi w'akanama), abagize inzego z'umutekano, umuyobozi w'ishami ry'imiyoborere myiza (umwanditsi), undi wese Akarere kakifashisha mu gukemura ikibazo;
- Mu gihe havutse amakimbirane hagati y'amakipe y'Imirenge, Umunyamabanga Nshingwabikorwa w'Umurenge ufite ikibazo niwe wenyine ufite ububasha bwo kwandikira akanama nkemurampaka ko ku rwego rw'Akarere. Mu gihe amakimbirane ari hagati y'amakipe ahagarariye uturere, umuyobozi w'Akarere/ Umuyobozi Nshingwabikorwa w'Akarere ni we wandikira akanama nkemurampaka ku rwego rw'intara n'Umujyi wa Kigali ndetse no ku rwego rw'Igihugu.
- Ikirego kigomba gutangwa mu masaha 24 y'akazi, abarwa uherye igihe umukino warangiriye;

- Abagize akanama nkemurampaka kuri buri rwego bamenyesha urwego rwatanze ikirego mu nyandiko cyangwa mu bundi buryo icyemezo cyafashwe nibura mu minsi ibiri.

XII. GAHUNDA Y'AMARUSHANWA UMURENGE KAGAME CUP 2025-2026

a) Gutoranya no kwandika abakinnyi b'umupira w'amaguru muri Sisiteme:

Kuva tariki **01/12/2025** kugeza tariki **31/12/2025**

b) Amarushanwa ku rwego rw'Akarere:

Amarushanwa azatangira tariki ya **09/01/2026** kugeza tariki ya **22/02/2026** Kuri icyo tariki uri Karere kazaba gafite ikipe y'Umurenge ugahagarariye.

c) Amarushanwa ku rwego rw'Intara n'Umujyi wa Kigali:

Kuva tariki **27/02/2026** kugeza tariki ya **29/03/2026** Buri Intara n'Umujyi wa Kigali bizaba bifite amakipe abihagarariye.

d) Amarushanwa ku rwego rw'Igihugu :

- Imikino ya $\frac{1}{4}$ na $\frac{1}{2}$ izaba kuva tariki **05/05/2026** kugeza tariki **31/05/2026**

- Gusozwa Imikino y'Umurenge KAGAME Cup **2025-2026**

Biteganijwe ko imikino isoza (finals) izakinwa tariki ya **20-21/06/2026**

XIII. INGENGO Y'IMARI N'IBINDI BITEGANYWA

- Ibizakenerwa byose muri aya marushanwa ku rwego rw'Imirenge n'Akarere bizatangwa na buri Karere;
- Ibizakenerwa ku rwego rw'Intara n'Umujyi wa Kigali: Bizatangwa n'Akarere, Intara n'Umujyi wa Kigali;
- Ibizakenerwa ku rwego rw'Igihugu bizatangwa na MINALOC, MINISPORTS, MoYA, RGB, RNP, NCPD, FERWAFWA, RAF, NPC, FERWACY, FERWABA, FRVB, n'abandi bafatanyabikorwa bandi baboneka;
- Transport n'ibindi bigenewe abakinnyi ku makipe azagera ku rwego rw'Igihugu bizatangwa n'Akarere

XIV. INGINGO ZISOZA

Komisiyo ya buri rwego rushinzwe gutegura amarushanwa, irasabwa kujya itanga raporo muri RGB kuri buri mukino igaragaza uko buri mukino wagenze , hagatangwa kopi kuri MINALOC na MINISPORTS.

Ku zindi ngingo zitavuzwe muri aya mabwiriza hazitabazwa amategako y' Ishyirahamwe rishinzwe uwo mukino mu Rwanda.

NB:

- Buri rwego rw'Akarere, Intara n'Umujyi wa Kigali barasabwa gukora gahunda y'uburyo amakipe azajya ahura, mu rwego rwo gufasha Abayobozi ku rwego rw'Igihugu kuza gukurikirana amarushanwa.

Muri aya marushanwa, hahembwa amakipe ane ya mbere mu bagore no mu bagabo n'abakinnyi 5 ba mbere mukino ikinwa n'umuntu ku giti cye .

XV. UBURYO AMAJONJORA AZAKORWA

1. KU RWEGO RW'AKARERE

Hazakoreshwa amajonjora mu matsinda atandukanye hakurikijwe umubare w'Imirenge Akarere gafite, hatangwa amanota hazafatwe uwa mbere ufite amanota menshi ariwe uzakomeza ahura n'undi watsinze kugeza hagaragaye Umurenge wa mbere ku rwego rwa buri Karere;

Ikindi mu gutegura amajonjora, Komisiyo y'Akarere, ishingiyeye ku mubare w'Imirenge y'Akarere gafite, yakwifashisha ingero zikurikira zizakoreshwa ku rwego rw'Intara n'Umujyi wa Kigali mu gutegura uko bazajya bahura bifashishije ababimenyereye mu kubitegura.

2. AMARUSHANWA KU RWEGO RW'INTARA, UMUJYI WA KIGALI NO KU RWEGO RW'IGIHUGU

- a) Ku Rwego rw'Intara n'Umujyi wa Kigali , abagize Komite itegura amarushanwa bategura inama itumirwamo abahagarariye buri Karere, bagakora tombola y'uburyo bazahura, bakemeranywa igihe n'ikibuga bazakiniraho;

b) Ku rwego rw'Igihugu, Abayobozi bashinzwe Imiyoborere ku Ntara n'Umujyi wa Kigali, batumirwa mu nama tekiniki yo k'urwego rw'Igihugu, bagatombora uko Intara n'Umujyi wa Kigali zizahura muri $\frac{1}{4}$, bakemeranywa no ku bibuga bizakoreshwa.

Bikorewe i Kigali, ku wa 12 Ukuboza 2025


Nelly MUKAZAYIRE
Minisitiri wa Siporo

